



FAAVAEINA 1839

O LE SULU SAMOA

FEPUARI 2019

email: sulusamoa@cccs.org.ws -Main Office: Ph. 24414, Ext 30 - website: www.cccs.org.ws

## O le Agaga o le Atamai i Gagana

PEPA FONOTELE 2018

**AUTU: O LE AGAGA O LE ATAMAI I GAGANA  
THE SPIRIT OF WISDOM  
IN LANGUAGES**

Saunia: Dr Tavita T. Maliko (FS)  
21 Me 2018

**O LE AGAGA O LE ATAMAI I GAGANA**

*The Spirit of Wisdom in Language*

O le Manatu Autū o lenei Fono Tele, lea ua faaulutalaina ai lenei pepa, o loo atagia ai ni vaega tetele se tolu: O le **Agaga** (Spirit), o le **Atamai** (Wisdom/Knowledge) ma le **Gagana** (Language). A o le Manatu Autū o lenei vaiaso e faapea: **A'oa'oga mai le Agaga** (Teachings from the Spirit). A o le Manatu Autū o lenei aso e tusa male Tusi Faitau Aso a le Ekalesia e faapea: **Lauga a le Agaga** (Spirit Sermon). Peiseai e 'auga lava nei manatu uma i le AGAGA.

O le a taumafai lenei pepa e autalaina nei mataupu tetele, ma lo latou feso'ota'iga, i totonu ole agaga o lenei vaitau o le Kalena Kerisiano, le **Penetekoso**. E fia avatu ai foi ni motugā'fa fa'atauva'a lava o lenei pepa i se tasi o mataupu o taatia nei i paaga mo lenei Fono Tele, e uiga i le totogiina o lafoga faa-le-malo a faifeau.

E matalasi le faauigaina ma faamataupu silisili o tusiga a Luka o faamauina i le tusi o Galuega a le 'au Aposetolo mataupu e lua, lea o loo fofola mai ai le tala lauiloa i le afio ifo o le Agaga Paia i le aso Penetekoso. Ui la ina mata felefele tafa e tele o lenei tala e uiga i lea aso iloga, a o le a faamati'e na oni vaega e talafeauga ma le autū o lenei fono (Agaga, Atamai, Gagana).

**F E S O ' O T A I G A**  
**(COMMUNICATION)**

E lasi le faauigaina o le Penetekoso ma mea na tutupu ai, ma ole le aofia matagi i le tele o lenei tamaoaiga i lenei pepa, ae fia tulimata'i le tasi o manatu e faapea: **O le 'auga poo le ute o le Penetekoso, o fesootaiga (Pentecost is about communication)** (Gonzales & Gonzales). O le faalogoina o le "taalili mai le lagi peiseai o le matagi ua agi

*(faaauau itulau 4)*



**O le fa'amanuiaga a Iesu i ona so'o.  
A'o latou mafuta faatasi i le mauga o Olive.  
Ona ia afio a'e lea i le lagi.  
E iloa o o'u so'o moni outou, pe a outou fealofani.  
la outou manuia.**

---

# O LE LAUGA

Tusi Faitau: Kenese 48:13-22.  
Ioane 8:12-20

Matua Lauga: Kenese 48:15b

“.....O le Atua lava o lē na savali ai i ona luma o’u tamā o Aperaaamo ma Isaako, o le Atua lava o lē na fagaina a’u talu ina fanau o a’u, ua oo mai lava i le aso nei.” O ana upu fa’amanuia ia Iosefa ma lana fanau, ma le talitonuga atoatoa, o le Atua foi lea e manuia ai lona aiga i le lumanai. O upu ale tagata faatuatua ma talitonu faamaoni i le ta’ita’iga a le Atua.

**Manatu Autu: “Ta’ita’iga a le Atua mo le Soifuaga Atoa.”**

## **Faatomuaga**

O upu e masani ai le atunuu pea oo ina feiloa’i ni nuu se lua, po o se malaga foi ua afea se afioaga. E sa’ua lava i le faalogo ia faaupuga nei, pea oo ina faatino lauga o le taeao fesilafai.

“ Faafetai i le alofa o le Atua, ua mafai ai ona tatou fesilafa’i i le manuia ma le fiafia, a le o le faanoanoa. Auā ana le seanoa le ta’ita’iga a le Atua i lo outou soifua, ma si o matou ola vaivai, tatou te lē feiloa’i ma le manuia i lenei aso”.

O upu o le agaga faafetai, o le agaga fiafia, e fa’afetai ai le alofa ma le agalelei o le Atua soifua, ona a lana ta’ita’iga i le taimi umi lea sa sau ai le faigamalaga. Auā e le taumate le tele ma le anoanoa’i o fa’afitauli i ala sa uia mai e le faigamalaga, ma popole ai le mafaufau ma le agaga, pe taunuu ma le manuia le faigamalaga, pe leai foi. Ae ua silafia lelei foi e le tagata, e le o se iloa poo se malosi o se tasi, ua mafai ai ona fa’ataunuuina lenei faamoemoe. Ae ua na’o le Atua lava ma lana Ta’ita’iga alofa. O le talitonuga lea a le tagata faatuatua.

**FEAGAIGA TUAI (Kenese 48:13-22)**

O le talitonuga foi lea a le toaina o Iakopo, e pei ona molimau mai ai le tusi a Kenese. O lea ua tautino

Iakopo e tusa ma lana molimau i le ta’ita’iga a le Atua i lona olaga, e pei ona i ai upu ua fai ma matou matua.... “O le Atua lava o le na savali ai i ona luma o’u tamā o Aperaaamo ma Isaako, o le Atua lava o lē na fagaina a’u talu ina fanau o a’u, ua oo mai lava i le aso nei.” O ana upu fa’amanuia ia Iosefa ma lana fanau, ma le talitonuga atoatoa, o le Atua foi lea e manuia ai lona aiga i le lumanai. O upu ale tagata faatuatua ma talitonu faamaoni i le ta’ita’iga a le Atua.

E tolu (3) lava ni ata po o ni vaaiga o lo o faamatala mai e le matua, o lo o atagia ai le ta’ita’iga lea a le Atua i le olaga o Iakopo.

**Manatua 1. - “O le Atua auai i so’o se taimi ma so’o se mea”.** I taimi uma, ma aso uma o le olaga. O le molimau a Iakopo, o le Atua lava o le na savali ai i ona luma o’u tama o Aperaaamo ma Isaako, o lea foi ua oo mai i ona taimi, o le Atua lava lea e toatasi o lo o ta’ita’iina lona aiga.

**Manatu 2. -”O le Atua ma lana tausiga”.** Ua molimau Iakopo, o le Atua lava o le na fagaina a’u talu ina fanau o a’u, ua oo mai lava i le aso nei. Ua faamatalaina ai le ta’ita’iga a le Atua e le na’o le ta’ita’i, e fofoa, faafailele, tausi, ma fafaga le tagata i lona olaga atoatoa. O le upu “fagaina” e pei ona aumai i le matua. O lona uiga i le gagana Eperu, o le upu lava o lo o fa’aaogaina e le fai Salamo e faasino i le ta’ita’iga a le leoleo mamoe. O lona uiga, o le tausiga a le Atua i le ola o Iakopo, ua ose tausiga faaleoleo mamoe lelei.

O le ta’ita’iga faaleoleo mamoe, e le na o le ta’ita’i, a o le galuega e aofia ai le tausi, leoleo ma puipui le ola, o le fofoaina o le olaga o le tagata i ona itu uma, ua ia manuia i le tino, mafaufau ma le agaga.

**Manatu 3 - “O le Atua e ia te i latou ona o le ola usitai”** O le ta’ita’iga a le Atua e mana’omia ai le ola usiusitai o le tagata. Aua o le tali atu lea a le tagata soifua i le alofa ma le agalelei o le Atua i lona olaga atoatoa. O lona uiga e manaomia le faalogo, usita’i ma savali ai i le ta’ita’iga a le Atua, ona faamanuia mai lea o le Atua i le tagata.

O le olaga o Iakopo e le faigofie, sa pologa ona o lona naunau ia manuia lona olaga. Sa fetaiai ma le tele o luitau ma faafitauli, na ia faoa ai manuia o lona uso matua o Esau i se auala sesē. Sa ia tautua foi ia Lapana i tausaga e sefulufa (14) ona o lona manao ia Rasela. Ae ui i nei faafitauli, e lei faavaivai pe solomuli ai lona ola finau mo faamanuiaga a le Atua. O lona ola pologa na faeaina ona o le Atua ma lana ta’ita’iga.

E ala ona finau Iakopo ona o faamanuiaga a le Atua, auā na te mautinoa ua pau lea o le ala e manuia ai le savaliga o le olaga nei.

O loo taua foi i le tusi a Kenese mataupu 32, le finauga a Iakopo ma le agelu, lea na suia ai lona igoa ia Isaraelu. O lona uiga, o se ua finau i le Atua atoatoa ma tagata, ma ua manumalo ai. O lona manumalo lea na fesuiaina ai lona mafaufau, ma ua toe foi e faalelei ma lona uso o Esau. Le Iakopo fou lea ua fa’asuafaina ia Isaraelu, lea ua taunuu ai le la feagaiga ma le Atua; e tupuga mai ia te ia nuu uma o le lalolagi.

O le ta’ita’iga foi lea e manatu Iakopo e manuia ai lona aiga i le lumanai. E pei ona ia faamanuia atu ai ia Manase ma Efaraima. E tusa ai ma le tala sa faitauina, e ese foi le faatinoina o le faamanuiaga a Iakopo i tama nei. Na manatu Iosefa e tataua ona maua e Manase faamanuiaga o le ulumatua, o le ala lea sa ia aumai ai o ia e faafeagaiga ma le lima taumatau o Iakopo, ao Efaraima e faafeagaiga ma le lima tauagavale.

---

# O LE LAUGA

Ae peita'i, ua ese foi le faatinoina e Iakopo o le faamanuiaga. E pei ona taua e le fuaiupu e 14, Ona faaloaloa atu lea e Isaraelu o lona lima taumatau, ma faaee ai i le ulu o Efaraima le uii, ua faaee lona lima tauagavale i le ulu o Manase le ulumatua.

Ua faapea Iosefa, ua leaga le vaai a le toaina, aua ua matua foi. O le ala lea o lona tago atu ma taumafai e faasa'o. Ae ua le mafai le toaina, ua na fai faautauta i ona lima. O lona uiga, sa ia faatinoina ma le mafaufau lelei mea uma lava. O le felavasa'i o lima i itu fa'afeagai. Ua faaali manino mai e Iakopo, o le auala pu'upu'u ma faigofie lea e maua ai faamanuiaga mo lona aiga.

## **AOTELEGA**

O le matagofie lea o le ta'ita'iga a le Atua i le olaga o Iakopo. Auā o le Atua e auai i so'o se taimi. O le ta'ita'iga e faia i le olaga atoa, e le mafai e se tagata soifua ona faatinoina i le atoatoa. E le tuulafoaina le tagata, ina ia fano atu i le malaia auā e ta'ita'i ma le alofa.

E tausi fa'aleoleo mamoe i lo tatou ola, e le gata ina puipui ma leoleo, ae fofoa, faafailele, tausi ma fafaga i aso uma. E le suia lava ae tumau, aua e manuia ai so'o se faiva e feagai ai. Ae e mo'omia lava lo tatou ola usita'i ma savavali i ala o le Atua, ina ia tatou maua ona manuia.

## **Feagaiga Fou (Ioane 8:12-20):**

O le manuia foi lea o le Atua, tatou te maua pe a savavali i lona malamalama, e pei ona aumai e Ioane.

O le vaega tonu lea o le tusi a Ioane, o loo taupulepule ai ta'ita'i o le lotu Iutaia, e saili se auala e molia ai Iesu. O lea faatoa uma ona latou aumai le fafine

mulilua ia te ia. Ua latou tusitusilima uma iai, o le fafine agasala. Ae peitai na faia e Iesu le faamasinoga tonu ma le sao, auā e leai lava so latou e mamā. Ua tautino Iesu, o ia o le malamalama na te aumaia le malamalama i le lalolagi. O tagata uma e mulimuli ia te ia, e maua le malamalama lea, e le toe savali i le pogisa.

O le malamalama o le ola lea, o ē uma e mulimuli ia Iesu e ta'ita'iina i latou i ala e maua ai le manuia ma le ola. O le pogisa, o ala ia e malaia ai le tagata, e pei o le molimau pepelo, mulilua, le faamaoni, ma le manao lasi. O le lalolagi lea o loo faamamafa mai e le tusitala, lea ua sau Iesu e aumai iai le malamalama. Ua faailoa manino atu lava e Iesu ona o lona alofa; ina ia latou maua manuia o le ola lea ua saunia e lona tamā.

Ae o lo o faamaa'a pea loto o ta'ita'i nei o le au Iutaia, auā latou te lei talitonu lava ona o loo fiafia pea i ala o le pogisa.

O le finagalo lea o lona Tamā, ia savavali tagata uma i ala o le Atua, e maua ai le ola e faavavau. Na soona nunumi le lalolagi ma pogisa, ao lea lava ua auina mai lava Iesu e faasino ma ta'ita'i le tagata ina ia maua le ola e faavavau.

O le faamanatu foi lea o le talalelei mo i tatou le Ekalesia. O lo'o ta'ita'iina pea i tatou e le Atua i aso uma o lo tatou ola. Ae ona ua faapogisaina o tatou mata i le matalasi o mea o le olaga nei. Ua punitia ai la tatou vaai atu i le Atua, ma ua itiiti ai le ola faatuatua i le tele o taimi. E vaivai ma faatauvaa le tagata, e le atoatoa foi. E femoumouai manatu ma lagona, e le tumau i se mea e tasi, aua o le vaivaiga lava lea faale-tagata. E galo le alofa ma le agalelei o le Atua ona ua tele le iloa.

Lea ua a'oa'o mai le tala ia Iakopo. E le faigofie le olaga nei, e feagai pea ma faafitauli ma luitau, e tofotofoina ai le ola faatuatua. E le mafai foi e le malosi faale-tagata ona tu ma tetee atu; Ae a tu'utasi o tatou faamoemoega uma i le Atua, e le fesiligia lava le manuia. Aua o le Atua e leoleoina i tatou, tausi ma fafaga lana fanau ia aua lava nei matelaina pe fano atu i le malaia. Ae ia manuia ma ola fiafia, e faia lona finagalo.

E i ai taimi e lagona ai le faavaivai ma le musuā, aemaise pea utiuti le faasoā. Ae tatou faamalolosi ma faamoemoe i le Atua ma lana ta'ita'iga e manuia ai feau ma galuega o lenei tausaga.

E moomia ni ta'ita'i e totoa loto, e ta'ita'i ma le amiotonu. E ta'ita'i ma le alofa ina ia ola ai ni agaga se tele. E le gata ina ta'ita'i, ae avea foi ma auauna i taimi e mo'omia ai le fesoasoani. E le faamoemoe i lona malosi ma lona atamai ae faamuamua le Atua i mea uma na te fai.

O le Atua lava o le ta'ita'i sili, e tonu ma sao ona ala uma, e manuia ai o tatou aiga, nuu, atunuu aemaise le ekalesia i lana ta'ita'iga.

O le ta'ita'iga alofa lea a le Atua i le lalolagi, na auina mai ai lona alo pele e to'atasi. E le gata ina ta'ita'i ae na avea foi ma auauna i tagata. O lona maliu ma lona toe soifua manumalo mai i le oti ma le tu'ugamau. O le atoaga lea o lana ta'ita'iga, ma ua saofaga uma ai i tatou i lona malo e faavavau, pea fai tatou te faatuatua ia te ia i le agaga ma le faamaoni.

Ia tumau atu pea i le Atua poto e to'atasi, le viiga, le fa'amanū ma pule a'oa'o uma lava, nei seia o'o i le faavavau,..... faavavau lava...AMENE...

**Saunia: Uta Muaulu (FS)  
EFKS Fasitoo-uta  
Malua**

# O le Agaga o le Atamai i Gagana

tele mai. Ua iloa foi e i latou o laulaufaiva **peiseai** o le afi ua vaevaeina, ua nofo i o latou luga taitoatasi” Galuega 2:3-4. O le gagana o fa’aaogaina i upu nei, ole **gagana faa-faatusa**, auā o le taalili mai le lagi o loo ta’utino lava e le tusitala, e le o se matagi, ae “peiseai o le matagi”; o laulaufaiva foi ua i luga o i latou e le o se afi, ae “**peiseai** o le afi.” Tasi lea o tafa ua afua ai ona toe to manatu nisi, sei toe sasa’a le fafao ma toe fesili:

\* Poo tonu ea le faamamafa o silasila pea i ai i tatou le ‘au faitau Tusi Paia i le uiga moni o le Penetekoso?

\* Auā afai ua faaogā le gagana faa-faatusa, o le fesili: pe le o le matagi ea ma laulaufaiva afi, o le faauigaina lava lenā (interpretation) o le Penetekoso e le tusitala, nai lo le faapea, o le matagi ma laulaufaiva afi o loo fia faauigaina, faatoa malamalama ai le uiga moni mo le Penetekoso? (*Could it perhaps be that these phenomena are the interpretation of Pentecost rather than being themselves the matters that need interpretation?*) (Boer, 1954).

O le uiga o lea manatu, faamata e le o le agaga ea o le tusitala na ia faaogaina ai le gagana faa-faatusa o le **matagi taalili ma laulaufaiva afi**, o lona lava lea faauigaina o se **amataga fou**, ma lona fia faamapu’epu’e o le **tāuapa’i tumutumu** (*immense importance*) o le afio ifo o le Agaga Paia, atoa ai male uiga loloto o lona taeao fou le taeao na i Ierusalem- le Taeao o le Penetekoso. Afai o lea, e le taumate e mafua ona o le manatu o le tusitala, e manusina le soā le aso lea (*Penetekoso*) i le **aoao tetele ole tala o le faaolataga** (*salvation history*), auā o le taeao lea na auina ifo ai le Agaga Paia, ma le mana, ma ua feso’ota’i ai le galuega a Keriso toe tu ma le galuega fa’aaau a le Agaga Paia, feso’ota’i foi le Feagaiga Tuai ma le Feagaiga Fou, tainane le tala i le ‘au faatuatua anamua ma i tatou i aso nei.

Manatua foi, o le aso Penetekoso o se tasi o Taeao faitauina ole Tala Lelei, e le o se taeao na faafuaveta, a o le aso sa atofa auā o se taeao na valoia e le au perofeta faapea foi Iesu (Luka 24:45-49; Galuega 1:8) faapea o le aso lea e afio mai ai le

Agaga Paia. Lona uiga, o se taeao o matamata tetele lona sao i fafauina ole ola o le Ekalesia i le Feagaiga Fou, le aso o le **Agaga Paia** – o le Agaga lea e (i) maua ai le *mana* (ii) e fai ai le ‘au soo ma *molimau* ia Keriso. O le **mana** ma le **molimau**, o le tiute lea o le Ekalesia pei ona poloa’iina e Iesu: “o atu e fai nuu uma lava ma so’o ...ia outou a’oa’o atu ia te i latou i le suafa o le Tama ma le Atalii ma le Agaga paia” (Mataio 28: 16 – 20).

O le Ekalesia – o le Ekalesia *molimau*. Lona uiga, o le **vavega ole Penetekoso**, e lē o le matagi taalili ma laulaufaiva afi, po o e tautala i gagana eseese (e pei ona faamamafa e isi), a ole **Afio mai o le Agaga, ma le mana**, na fa’aa’u’upegaina ai le au so’o ma tautala ai i gagana eseese, ma avea ai le Ekalesia ma ekalesia ua *faagaganaina*, ua tōina i ai le *atamai* o le faugagana mai le lagi, *efeso’ota’i* atu ai, e talai atu ma *molimau* atu ai i le lalolagi, le faaolataga mai le lagi. O le Penetekoso – o le aso o le: **AGAGA O LE ATAMAI I GAGANA**.

O le Agaga ma le *mana* lena, ma le **faugagana** lena, na fa’agaganaina ai Petelu ma le au so’o lea sa lafilafi solo ina ua fāliu le la i le soifua i le tino o Keriso, a lea ua maua le loto tele na tulai ai e *lauga ma molimau* atu, ma talai atu le tala lelei.

## FESO’OTAIGAMA LE FEAGAIGA TUAI

Afai o le manatu o Luka le tusitala o le tusi o Galuega,

\* e fia faailoga ma faamanatu se aso fanau aloa’ia o le Ekalesia Kerisiano  
\* tainane se ma’a tulimanu faa-kalena o le afio ifo o le Agaga Paia i le aso Penetekoso e fai ma *molimau*, ma fa’aaau le galuega a Keriso,  
\* ae maise ia maua e le ‘au-so’o-*molimau* le *mana*,

\* tainane le feso’otai lelei o le Penetekoso mai le Feagaiga Tuai ma le Feagaiga Fou, e leai lava la se isi aso e sili atu nai lo le aso na atofaina, auā o le Penetekoso:

\* O le igoa faa-Feagaiga Fou lea o le **Tausamiga o le Vaisapati** (*Feast of Weeks – Esoto 34:22*), lea e faamanatu ai le tu’uina o le tulafono ia Mose i le

Mauga o Sinai, o le 50 aso talu ona tuua Aikupito.

\* A o le Tausamiga o le Vaisapati, e fa’amanatu i le aso e atoa i ai le 50 aso mai le aso ina ua tuana ai le sapati, i le mavae ai o le Paseka (*i.e. 50 days after the “day after the Sabbath” following Passover*).

\* O le Penetekoso e ofoina atu ai **ulua’i fua** o seleselega e fai taulaga ai i le Atua (*Numera 28:26*).

\* O le aso foi lea na atoa i ai le **50 aso** talu ona afio ae Iesu i le lagi ina ua toe soifua mai le tuugamau (Davis, 2009).

E manatu nisi:

\* O le **Penetekoso i le Feagaiga Tuai** (Tausamiga o le Vaisapati) na avane ai le Tulafono i Sinai, e fesootai lelei ma le **Penetekoso i le Feagaiga Fou**, na auina ane ai le Agaga Paia.

\* O le tulafono Tuai na tusia i papa ma’a, ma le tulafono fou e tusia i le loto ma le agaga.

\* O le *feagaiga* na osia e le Atua ma lona nuu i le mauga, ma *Feagaiga Fou* na fafouina i le toto o Keriso, lea e *molimau* i ai le Agaga Paia.

E tele isi feso’otaiga o le Penetekoso ma le Feagaiga Tuai ua le asia i lenei pepa, ae pei lava ona faamatogi atu muamua, a silasila i le **aoao tetele o le tala** a le tusitala **mai le Evagelia a Luka** ma lona fa’aaauina i le **tusi o Galuega**, ona vavala mai ai lea o lana **faamamafa** ma lana faauigaina o le aso Penetekoso. A o le a le fa’amamafa a le tusitala i ana tusi e lua (Luka & Galuega)?

## O LE FAAMAMAFAMA O TUSI: LUKA & GALUEGA...AU APOSETOLO

E amata tusi e lua (*Luka 1:1; Galuega 1:1*) i le tagata e igoa ia Teofilo, ma e le manino poo ai lea tagata, ae foliga o Teofilo o i tatou uma lava le au faitau (*Willimon, 1988, p. 12*). E pei foi o Teofilo, ua tatou iloa foi Keriso, a o le tala nei, e faala’ei’au ma faamalosi i le tagata kerisiano o i totonu o le Ekalesia, ina ia tumau pea i le faatuatua – ia mautinoa, e ui ua faliu le la i le galuega i le tino a Keriso, a ua auina mai le Agaga Paia e faaauau lena *molimau*. O le tāua o le ‘au aposetolo ē na vaai tino (*eye witnesses*) ile toe tu o keriso (*Galuega 1: 21 – 22*) o le aumai lava lea o le *molimau* ma maututū i le moni ma le faamaoni o le tala ua aumai.

Manatu nisi sa tatau na faaigoa le tusi o Galuega o le: **Galuega a le Agaga Paia**, auā e na o Peteru ma Paulo o faamatalaina a la galuega, e tasi le fuaiupu o molimau ia Iakopo (12:2), e itiiti foi se tala ia Ioane, ae le aliali lava le isi anoano ole ‘au aposetolo. Na o tala o le Agaga Paia ma lona mana na faia ai vavega. Ui i lea e tele foi se vaega o le tusi (Galuega) e le o taua ai le Agaga Paia, e pei ua **ave ai le faamamafa i galeuga a le Agaga Paia, nai lo le āu’i’ili mai po o le ā le Agaga Paia** (Haenchen, 1971). O inā tonu lava o faavae ai le manatu, o le vavega o le Penetekoso, e ‘auga i **feso’ota’iga**, ae le o le ofoofogia o le tautala i gagana eseese, po le matagi malosi ma laulaufaiva pei o le afi.

### **PENETEKOSO MA LE TAUTALA I GAGANA ESEESE.**

Ole tala a le tusi (Galuega 2), sa i le fale le ‘au aposetolo i le aso Penetekoso, ae tupu ai le vavega pei ona taua. O le fuaiupu e 5 o faamatala ai tagata Iutaia sa nonofo i Ierusalem, o tagata ia ‘mai nuu uma lava o le lalolagi,’ ae na o ifo i Ierusalem i le vaitau lea, ona o le faamanatuina o le Penetekoso. Manatua o nei tagata Iutaia, e eseese uma atunuu e nonofo ai (ff. 9-11), lona uiga e eseese uma a latou gagana; a o le ‘au soo, e tasi lava la latou gagana e masani ai, o le gagana Aramaika, o le gagana foi lea a Iesu. Ae ina ua faalogo tagata ese nei i le taalili o le matagi, ona faapotopoto ane ai lea, ma o latou molimauina ai, le tautala o le au soo i gagana eseese. **O le a le uiga o le tautala i gagana eseese?**

E ese le tautala i gagana ese o i le molimau a Paulo (1 Korinito 14), ese foi le tautala i gagana eseese lea e faamatala nei e Luka (Galuega 2), auā e ui ina tele atunuu eseese ma a latou lava gagana lea ua potopoto nei i totonu o le fale (fuaiupu 9-11), ae ina ua tautala le au soo ma *molimau atu* i le tala ia Iesu, e leai lava se gagana o na mau gagana e lei

tautala ai le au so’o, ae malamalama lelei ai i latou e ou ia gagana. O le mafuaaga lea o le ofo o tagata aua latou te iloa, o le au aposetolo, o tagata Kalilaia, e tasi le gagana latou te iloa, na o le gagana Aramaika: “Faauta, e le o Kali laia ea i latou uma o e tautala mai nei? E faapefea foi ona tatou taitasi ma faalogo atu i lana lava gagana na tupu ma ia?” (ff. 7-8). O le vavega lena o le Penetekoso, ina ua mafai e le au aposetolo ona tautala i gagana a tagata ese – o gagana eseese- ma faasoa atu ia i latou le Tala Lelei a Keriso, i la latou lava gagana. O le vavega na mafaia, ina ua **“faatumuina foi i latou uma i le Agaga Paia**, ua afua ai ona **tautala i gagana eseese**, pei ona **foaiina mai e le Agaga ia te ia latou**” (Fuaiupu 4). Ioe, o le **Agaga** – na aumai ai le **mana** – na maua ai le **atamai** – o le atamai i **gagana** – o gagana eseese.

Ae afai o le finagalo o le Atua ia malamalama nei mau tagata eseese ma a latou gagana eseese, ma aganuu eseese i le tala Lelei, e **lua auala** e mafai ona faamalamalama ai le tala’iga a le au aposetolo:

**1. Muamua, o le auala faigofie** – ole tautala atu lea o le ‘au soo i le latou lava gagana, le gagana **Aramaika**, e faamatala ma momoli ai le feau, ae malamalam uma ai le ‘au faalogologo ua lolofi mai i totonu o le fale.

**2. Lua, o le auala faigata** – o le tautala lea o le au so’o i gagana eseese e pei ona faamatala nei e Luka, o gagana uma, mai atunuu eseese.

Ae afai o le manatu o Luka – mo le Penetekoso – i le aoao tetele o lana tala, e **fia faamatie ma faamamafa le:**

- Le amataina aloa’ia o le Ekalesia ma lana galuega tala’i/ molimau

- Ae maise le afio ifo aloa’ia o le Agaga Paia ma le mana e fai ai le galuega

- Ma ia fai lenā aso ma taulaiga o le soifua faatuatua o i tatou le au faitau/molimau

- A! e lētioa la filifilia e le Agaga le auala lona lua, le **auala faigata**, lea e tautala ai le ‘au aposetolo i gagana eseese uma lava oloo ōpoōpotutū i totonu o le fale, e **malamalama** ai le tagata faalogologo, le tagata ese, i lana lava gagana.

O le a nona le taua o le **auala faigata** (lona lua) na mafua ai ona filifilia e le Agaga, e molimau atu ai le fe’au, ae se’i muai faamapu’e le tāua o le **gagana**.

### **OLE GAGANA, ATAMAI, MALOSI MALEPULE**

O le manatu **faa-saienisi o le sosaiete** (*social science*), e i ai le upu e mafai ona faasamoaina, o le **Tala’ave** (*Discourse*), o lona uiga o le **faatinoina o le tautala ma le tusitusi** (*actual practices of talking and writing*). O le **tala’ave** la, e aofia ai so’o se ituaiga tala: tala o talanoaga, ata tifaga, tala o le TV/Leitiō, tala tu’u, fagogo, tala o nusipepa, Tusi Paia, tala mālīe, faleaitu, ma so’o se ituaiga tala e faaleoina, pe tusia pe vaiaia foi. O nei tala uma, e **fausia ai se ata pu mo’omo’o** o se mea na tupu (*event*), po o se tagata, poo se atunuu...e momoli atu ai se **feau faapitoa** (*present a particular image/message*). So’o se tala’ave, e se’elua mai ai ma le fe’au, a mea o le manatu ua aumai o le **mea moni lea**, po o le **amiotonu** (*justice*) po o le sa’o (*truth*) lava lea (Burr, 2003).

Lona uiga o le **tala’ave** (discourse), e fausia lava mai le **GAGANA**, ma o le gagana, E LENA ONA FA’AMATALA AI O LO TATOULALOLAGI, AE E FAUSIAAI FOI LE LALOLAGI, ma o lea fausaga e iai ona **taunu’uga ōgaōga**. O le ala lea e i ai le malosi telelē faatuāoia (immense power) o le gagana, ona e fausia e le gagana le mea moni po o le mea

(faaauau itulau 7)

---

# **“FETU’U TU’UNAI MUNIAO”**

---

E leai se manatu ia te a’u e tau fa’amatala le uiga o le ulutala o lenei tusiga, O le **‘FETU’UTU’UNAI MUNIAO’**. Peita’i, e lelei foi mo le silafia e le aufaitau. Ou te manatu e lē o ia te a’u se atoatoa e manino ai lenei fa’aupuga auā e tala lasi le atunu’u. Peita’i o le mea ua iloa, o le upu “**F E T U ’ U T U ’ U N A ’ I MUNIAO**” tasi lea o muāfetaiga (alagāupu) a le atunu’u na maua mai i le ta’aloga e fiafia i ai tamali’i i aso anamua, o le Seugā Lupe. O le laau e seu ai le lupe e ta’ua o le **na’aloha**, o le pito o le na’aloha e tautau ai le taga seulupe e ta’u o le **na’afa’oe**. O le pito o le na’afa’oe e feso’otai ma le na’aloha e i ai le liva e ta’ua o le **muniao**. O le liva la lea e fa’atonutonu ai le matala o le gutu o le na’afa’oe. A mana’o la le ali’i seu e fa’atelē le gutu o le taga seulupe (na’afa’oe), o le muniao la e fetu’unai ina ia faigofie ona seu le lupe ma maua. A maua loa le lupe ona fetu’una’i fo’i lea o le muniao ia fa’alaititi le gutu o le na’afa’oe ina ia le toe mafai e le lupe ona toe sola. Lea la e i ai le muāfetaiga a le atunu’u; **“IA FETU’UTU’UNA’I MUNIAO”**. O le mafua’aga ua filifilia ai, ona tasi lea o meaalofa a le Atua mo le tagata talu le amataga, o le sa’olotoga e filifili ai. (**FREEDOM OF CHOICES**). O lona uiga o lo o i ai lea saolotoga le avanoa e fetu’utu’una’i ai muniao i le tofā ma le fa’atofalaiga a le tagata lava ia i le mea e manuia ai le aiga, le nu’u, le atunu’u, faigamālō, aemaise le galuega a le Atua. O le fua i luma ma fua i tua, fa’atasi ma le fesili i le Atua o inā tatou te maua ai mea sili mo le agai

atu i le lumanai... (Manaia foi pe a i ai se uso e fia fesoasoani mai).

**Salamo 1:1 “Amuia le tagata e lē savali i le filifiliga a ē amio leaga, e lē tu fo’i o ia i le ala o ē agasala, e le nofo fo’i i le nofoa o ē tauemu...”**

O nisi ia o uiga masani o le soifuaga latou te faia le talaiga o le tagata, pe se tagata lelei, pe se tagata fa’ale-lelei, o lana savali, o lana tu, ma lana nofo... Ma ua fa’aogāina e le fai salamo nei uiga masani o le olaga e fa’amatala ai le ‘ese’ese o tagata e to’alua. Le tagata amio lelei (amio-atua) e i’u i le manuia, ma le tagata amio leaga e i’u i le malaia. Ta’atia ia le tagata amio leaga auā o lea ua mautinoa lona iuga, o le fano ma fa’aumatia e fa’avavau. Peita’i ua fia fa’atāua le tagata amio lelei...

Fai mai le fai-salamo; “Amuia le tagata e lē savali i le filifiliga a ē amio leaga.” Tasi lea natura o le tagata amiotonu, e iloa fetu’utu’una’i le tofā, na te iloa ai le auala e savali ai, e lē so’ona la’a, e lē so’ona si’i auā e fa’autauta... O le upu; **“...e le savali...”** O lona uiga, e le filifili fa’atasi, e le taupulepule fa’atasi, e le faifaimea fa’atasi, e le fia auai i taupulega a tagata amio leaga. Ma o le uluai maka lea e iloa ai le tagata lelei, o le tagata e taumafai e ‘alo ese i mea leaga. **Peitai e le na o le alo ese i mea leaga a ia fiafia i le mea lelei.** Ia manatua e tuāoi lava le manuia ma le malaia i lau la’a e tasi. Ma o le tagata atamai e iloa ona ‘alo ese i mea e malaia ai.

Fai mai le fa’aauau a le fai-salamo; **“...e lē tu fo’i o ia i**

**le ala o ē agasala...”** Tasi lea uiga o le tagata amiotonu, e le taumafai e alu i ai, e oo lava i le tu i le ala o e agasala, na te le fia faia, e le taumafai fo’i e fa’ataitai i uiga ma amioga a tagata amio leaga. So o se mea e tupu ai le agasala po’o le mea o lo o u ai le agasala, e le fa’alatalata i ai. Ae afai fo’i ua to’ilalo ai, ona ua sasi, e taumafai ia toe alu ese ai. O le mafua’aga lenā o le fa’aamua a le fai-salamo i so’o se kerisiano e fa’apea, auā o uiga na o le tagata e mata’u i le Atua...

**“e le nofo fo’i i le nofoa o ē tauemu...”** O lo o ta’ua e le failauga o le tasi lea mea e fitu i ai mea e inosia i luma o le Atua, o le tagata na te fa’atupu le fe’itaga’i ma le femisaa’i i le va o tagata. Peita’i o uso moni lava ia o tagata fa’atauemu, e ‘auaiga ma taufaifai ma taumuimui, ae o uiga na e mafua ona o le fa’asausili o le tagata, ma e leai se filēmu e maua ai. O le mafua’aga lenā o lenei fa’aamua i ai latou e lē nonofo i le nofoa lea, leaga o le nofoa o tagata ua tete’e i le Atua. O le nofoa lea na fano ai Isaraelu ina ua faifai ma muimui iā Mose i le vao, o le nofoa foi lea na nonofo toalua ai le ulugali’i pepelo o Anania ma Safaira, lea na fano i le aso e tasi, ina ua la fa’atauemu e ala i le pepelo i le Agaga Paia. (Fai mai Peteru: *“Se a le mea ua oulua loto gatasi ai e tofotofa i le Agaga o le Ali’i?”*) Ma o le nofoa e lē tataua ona nofo pe saofa’i ai se tagata amiotonu.

O le atoaga lea o le fa’amatalaina e le fai-salamo o le tagata lelei, le tagata e mata’u i le Atua. E lē savali, e lē tu, e lē nofo fo’i, na te lē faia lava se mea e inosia i le Atua. Pau a le mea e naunau i ai o le mafaufau i le tulafono a le Alii i le ao atoa ma le po. Ma ua fa’atusaina i le la’au e

tu i tafatafa o le vaiatafe. (Ia ua tatou iloa so o se la'au e tu i tafatafa o se vaiatafe e tataua ona ola lauusiusi auā e maua e ona a'a i taimi uma le suavai) E fa'apena le tagata amiotonu e ola fiafia ma ola saoloto, so ose mea na te faia e fa'amanuia i ai le Atua. O le ituaiga tagata lea e iai Iosefa, na agaleagaina e ona uso, na fa'aosoosoina i Aikupito ae lei to'ilalo ai lona fa'atutua i le Atua... So o se mea na tago i ai ona lima e fai na manuia, so ose aiga e nofo ai na manuia. Aisea? Aua sa ia te ia le Ali'i.

Le fanau a le Atua, e ese le tāua o lenei fa'amanatu moi ta'ua le au-kerisiano. Vaai pe lē o e fiafia e savali i le ala o ē agasala. Vaai pe lē o 'oe le isi lenā tou te taupulepule fa'atasi ma tagata amio leaga, e sasa'a le toto o le tagata lē sala. E le gata i lenā ae sei vaai pe lē o i ai i nofoa o lou fale le nofoa lea o e tauemu, manatua o le nofoa lenā o ē tete'e i le Atua, nei fano ai oe ma lou aiga.

Fai mai le fai-salamo; **“O le mea lea e le tutū ai o ē amio leaga i le fa'amasinoga...”** O lona uiga, e leai lava se tagata amio leaga, e sao mai i le amiotonu a le Atua, tusa po'o le a le maualuga po'o le a le atamai e le 'alo ai le fa'amasinoga amiotonu a le Atua. Po o le a le lelei o upu molemole, ma le potu e fai ni togafiti e sola ese ai e le mafai, leaga e leai se mea e lilo i fofoga o le Atua. Fai mai le fai-salamo, **“Auā ua silafia e le Alii le ala o ē amiotonu; a e fano lava le ala o ē amio leaga”**. Ua uma ona fa'amatala e le fai-salamo le matagofie o le tagata amiotonu, ma ona manuia, a ua ia toe fa'amanatu mai lava, le lelei o se lafitaga mo le tagata amioleaga. O lona uiga e lei faia lava e le Atua se vaipanoa o le lalolagi e sola pe lafi ai se tagata fai mea leaga. Fiu le au gaioi ma le au fa'atupu fa'alavelave e fesolasolaa'i o lo o sisila lava fofoga o le lagi, e fano lava le ala o e amioleaga.

Po o fea lava tatou te sōsōla i ai mai iā tatou mea leaga sa fai ma mea leaga o lo o fai pea, po o fea fo'i tatou te lalafi ai ina ia leai sa tatou mea e fai, tatou te fiu fo'i e tuuai i nisi o tatou le faamaoni, lea lava ua fa'amanatu mai e le fai-salamo, “...e fano lava le ala o e amioleaga”. **O fea o e tu ai nei?** O e tu i tafatafa o se vaiatafe, po o e tu i tafatafa o se ogaumu taopopo, o maua e a'a o lou la'au se mālu o le suavai, pe na'o le vevela o le afi i taimi uma.” O le laau e iloa i ona fua, a'o le kerisiano e iloa i ana mea e fai. Ua manuia se mea ua e faia? A'o sa'o le agaga o faia ai? Le tagata amiolelei, fai mai le fai-salamo; **“...e fua mai ona fua i ona lava tau; e le to'ulu fo'i ona lau; e manuia foi mea uma na te faia”**

**Saunia:**

**Keneti Leaupepetele (FS)**

*EFKS Savaia & Tafagamanu – Uta.*

*(faaauau i le Sulu Mati)*

## OLE AGAGA O LE ATAMAI I GAGANA

e le moni, le mea lelei po o le lea lē lelei, le tagata lelei ma le tagata leaga, le sa'o ma le tala'ole. O le **malosi (power)** o le tala'ave e mafai ai ona fa'aeaina se tagata po'o se atunu'u, e mafai ai foi ona faatama'ia ma faato'ilaloina se fili, e mafai ai foi ona tatou talia se mea leaga e fai ma mea lelei.

E iai le feso'ota'iga o le tala'ave (*discourse*), le atamai (*knowledge*) le malosi (*power*) male pule (*authority*) (*ibid*), auā o se tagata po o se atunu'u na te pulea le tala'ave po'o le gagana (*Discourse*), o ia foi e iai le atamai (*knowledge*) ma le malosi (*power*) ma le pule (*authority*). Lona uiga, o lē e **pulea** le gagana, e **pulea** foi

le atamai, e ia te ia foi le malosi – le malosi lena e na te pulea ai isi tagata. O le uiga loloto lena o le fa'aaogā ai e le Agaga o le **aua la faigata (lona lua)** lea na tautala ai le 'au aposetolo i gagana ese a tagata ese e faasoa atu ai le Tala Lelei, e ui latou te le'i a'oa'oina ia gagana.

Auā ana fai e tautala le au so'o i la latou lava gagana i le aso Penetekoso, se manū faapenei o faapena foi i tatou ma le lalolagi kerisiano uma,

· E tau a'o le gagana Aramaika, leaga o le gagana lena ma le tala'ave lena na aumai ai le feau a le Agaga, o le gagana foi lena tatou te tapuai ai.

· S emanū e leai ni o tatou peleue ae fai o tatou ofu talaloa ma a tatou ava pei o le au aposetolo, leaga o tu ma aga ma laei na na laei ai le Agaga.

· Se manū tatou te mulimuli lava i le ituaiga tapua'iga, i tu ma agaifanua (culture) faa-aposetolo

· Se manū o i lalo lava ole pule ma le faamalumalu a le au aposetolo la tatou foi Ekalesia ma Ekalesia uma o le lalolagi.

Peita'i, **o le tautala ai o Peteru ma le 'au aposetolo i gagana eseese**, a tagata eseese, ua iloa ai , e tusa ma le aoao tetele o le faamoemoe o Luka:

· e tatau lava ona **faaliliuina le feau** a le Agaga **i la tatou lava gagana**, auā e o'o lava i le gagana Eleni (Greek) na tusia ai e Luka

*faaauau itulau 9*

# FAIFEAU MAA'OA'O I'U MAI MALUA UA AVANOAMO AULOTU O LOO TAU SAILINIO LATOU FAIFEAU.

Ua taoto le i'ugā fono a le Komiti o Feau Eseese (KFE 05/134) ina i fa'aalia i le Sulu Samoa suafa o faifeau ma a'oa'o ua i'u mai Malua e le'i penisione mo le silafia e aulotu, auā a latou filifiliga mo ni a latou faifeau. O nisi nei ua mafai ona maua mai:

## OFISA TUTOTONU EFKS TAMALIGI.

1. Vavatau Taufao (FS) – Failautusi Aoao EFKS
2. Rimoni Wright (FS) – Teutupe EFKS
3. Epati Setefano (FS) – Komesina Fanua ma Fale EFKS
4. Anzac Tuala (FS) – Failautusi Fesoasoani
5. Vaai Tua (AM)
6. Risatisone Taua (AM)
7. BJ Faui (AM)
8. Ututau Tauati (AM)
9. Faamoana Fuimaono (AM)
10. Senitenari Autagavaia (AM)
11. Tasele Tuluauau (FS)
12. Iopu Kalepo (FS)
13. Ulale Sakaio (FS)
14. Peniamina Neueli (FS)
15. Iusitini Leiloa (AM)
16. Steve Palala (AM)
17. Fiamalua Peleseuma. (AM)
18. Panapa Jr Panapa (AM)

## OFISA A'OA'OGA KERISIANO

1. Faitoaga Tolua (FS) – Faatonu A'oa'oga Kerisiano
2. Maleifua Tanielu (FS) – Sui Faatonu
3. Peteru Seiuli (FS)
4. Ietitaia Solipo (FS)
5. Semikueva Sua (FS)
6. Isamaeli Aulai (FS)
7. Apelu Lelevaga (FS)
8. Enoka Aperaamo (FS)
9. Satala Sa'u (AM)
10. Taulotoga Viliamu (AM)
11. Farani Pauga (FS)
12. Panapa Alafau (AM)
13. Vaegatootoo Magele (AM)

## EFKS TV

1. Vaa Lafaaua Sia (AM)

## KOLISI TUASIVI

1. Piula Pula (FS)
2. Setefano Logovii (FS)
3. Enele Auvaa (FS)
4. Ioane Tauiliili (FS)
5. Faisiota Autagavaia (FS)

## KOLISI TEINE PAPAUTA

1. Kuresa Tavalani (AM)

## KOLISI NUUAUSALA

1. Fuatimu Posese (FS)
2. Motusaga Lesa (FS)
3. Faletoese Faletoese (FS)
4. Eleasaro Eleasaro (FS)

## KOLISI MALUAFOU

1. Falaniko Sio (FS)
2. Iakopo Faasalaina (FS)
3. Tafatolu Lelevaga (FS)
4. Epati Sooula (FS)
5. Tanuri Pesaleli (FS)
6. Clay Tofilau (FS)
7. Amosa Mikaele (FS)
8. Tia Gatoloai (FS)
9. Enoka Pouniu (FS)

## KOLISI LEULUMOEGA FOU

1. Onosai Soo (FS)
2. Oata Tuatagaloa (FS)
3. Francisco Fatu (FS)
4. Vaigafa Paleono (FS)

## KOLISI O FAAFAIFEAU MALUA

1. Maafala Lima (FS) – Pule Kolisi
2. Alesana Eteuati (FS)
3. Olive Samuelu (FS)
4. Arthur Wulf (FS)
5. Vaitusi Nofoaiga (FS)
6. Latu Latai (FS)
7. Brian Kolia (FS)
8. Taipisia Leilua (FS)
9. Makesi Neemia (FS)
10. Karanita Petaia (FS)
11. Apela Ah Him (FS)
12. Tavita Maliko (FS)
13. Reupena Maulolo (FS)
14. Alesana Palaamo (FS)
15. Visesio Saga (FS)
16. Imoa Emanuel Setefano (FS)
17. Malutafa Faalili Leaupepe (FS)
18. Samasoni Alama (FS)
19. Seumaninoa Puaina (FS)
20. Filemoni Crawley (FS)
21. Kara Siaosi (FS)
22. Launiu Puniloa Time (FS)

\*\*\*\*\*



---

# O LE AGAGA O LE ATAMAI I GAGANA

lana molimau, o le gagana foi ua faaliliuina iai (a translation) le tala'ave ma le **GAGANA A LE AGAGA**.

o le tautala ai o Peteru ma le 'au aposetolo i gagana a tagata eseese, o le fa'amatu'u mai lava lea o le pule (*authority and control*) sa i le au aposetolo, i tagata ese, gagana eseese ma agaifanua eseese o le lalolagi, e pulea ai lona lotoifale faa-le-Ekalesia molimau.

o le tu'uina atu foi lea o lenā **PULE** i le tagata ese, le tagata faato'a faalogo i le Tala Lelei, i lana lava gagana , e pulea ai e ia lana lava tapuaiga ma lana galuega molimau i lana lava aganuu ma agaifanua e masani ai.

## **PENETEKOSO MA MEA O TUTUPU** (*Pentecost and current Affairs*)

E faapefea ona maua e le tagata le atamai (wisdom)? E mauaina ua ia iloa (*knowledge*) se tala (*tala'ave*) – ole tala e faalele e le gagana (*language*) – le gagana lena na te fausia lo tatou lalolagi – a o lena te pulea le gagana ma le tala'ave (*information*), na te pulea (*has authority ana control*) foi le atamai. E iā te ia foi le faitalia ma le pule po'o le a le tala e aumai, a o le a le tala e ufiufi.

E iai se fātuga malie a Toluma'anave Misiluki Su'a e uiga ia **Osama Bin Ladene** iai upu faapea:

Leaga le tagata e fia ulavale

Faaigoa lana kegi o le Faatupu faalavelave

Ua aapa atu nei ma le lima o Uncle Johnny

E faamuta lou olioli, ae tu'u sa'o oe i Seoli

Ausetalia, Peretania, Lusua Saina o iai

Faavave atu ia ma sei sue mai

Afai ae tou maua se mea o faapuna ai, Nonoa lana ava i se maea ae tosotoso mai

O le fesili, o le ā lava se mea matuiā a Osama na fai ia Misiluki? Masalo lava e leai se mea. A o fea na āfua mai ai lona to'atāma'i tele i lea fo'i tamālii e le masani ai? Na āfua ma fafau mai le **atamai** (*knowledge*) na ia maua ma o tatou maua uma mai i **tala'ave** o le TV, o nusipepa, o faasalalauga i letiō ma talanoaga faasamasamanoa. A o ai e pulea lena tala'ave, na televise, letiō ma nusipepa? E pulea lava e tagata o kamupani ma atunuu malolosi e pei o Amerika. O le tala'ave na fafau faapitoa, faapūmo'omo'o, ina o tatou maua ai se atamai i se ituaiiga mea moni (*a version of truth*) e **lē moni**, se amiotonu e **lē tonu**, se sa'o e **sili ona pi'o**, a ua tatou le tete'e atu lava iai, auā ona pau ia o tala'ave ua tatou maua, leaga e pule'esea le tala'ave, o faasalalauga ma le gagana, ua pule'esea foi lo tatou iloa ma se atamai, leaga ua pule'esea la tatou gagana.

O le tala'ave o mea ogaoga na tutupu i le lalolagi, e aofia ai le:

\* fasiotia o le peresetene Amerika o Keneti (*JFK*) o Lee Oswald Harvey

\* le tu lauele'ele o le tagata (*USA*) i le masina

\* le osofa'ia ai o fale tetele i Amerika (*Twin Towers*) e vaalele o faatonu mamao mai e Osama.

\* fa'asaolotoina o tagata Iraq mai faiga sauā a lo latou ta'ita'i Saddam Hussein, ma lona faaputu o mea tau mata'utia (*weapons of mass destruction*)

\* le pule lē alofa e le ta'ita'i o le malo Libya (*General Gaddafi*) o ona lava tagata

\* le alagatatau ona 'auai o atunuu pei o Samoa i feafaataua'iga saoloto (*free trade*) a le lalolagi.

\* le matuā tatau o le nonō mai o ni tupe se tele mai fale tupe tetele o le lalolagi e atia'e ai le tamāoāiga o le atunuu (*necessity of excessive borrowing in the name of development*)

O tala'ave uma nei i le manatu o le pepa: ua na oni tala'ave na fausia mai le gagana faapumo'omo'o taufa'asesē, , e faalilo ai Utumou'u ae fa'aaliali na o Utumā – o le tonu e le o iai se amiotonu, o le mea moni e lē o iai se faamaoni, le tala sa'o e tumu i le pi'opi'o, leaga e pule'ese la tatou gagana. E le tio foi la i le inainā fua o Misiluki ia Osama, auā o lona iloa ma le atamai (*knowledge*) faapumo'omo'o, e fausia mai le gagana ua pa puipuia e le malosia (*power*) o le lalolagi. O atunuu uma na o'o iai le ma'ema'eā o Amerika ae maise i Sasa'e tutotonu (*Middle East*), o loo i ai le tamāoāiga (*suāu'u, minerale, copper, siliva, gas, fanua etc*), o iinā le ute o le aveai ai o le gagana e fausia ai lo tatou lalolagi, auā e oo mai i le asō, o loo pamu ese pea e Amerika ma kamupani tetele le suāu'u a Iraq ma isi atunuu o Arapi.

O le ta'ita'i o le malo o Lybya o General Gaddafi, sa ola sa'oloto ai ona tagata, sa sa'oloto le soifua maloloina (*free medical care for all*), sa faasafua le tamāoāiga o le eleele ma le suāu'u i tagata uma, sa saoloto le a'oa'oina (*free education*). Na maualuga le tamāoāiga, ma sa fiafia le silia i le 80% o ona tagata i lana ta'ita'iga. Peita'i ina ua taumafai o ia e fausia se Uni fou mo atunuu lava o Aferika (*New African Union*) ma fa'aaogā ai le auro (*Gold Dinar*) i fa'afetaua'iga e 'alo ese ai ma le fa'aaogaina o le tupe lea e pule e atunuu i sisifo (*East*), o le amataga

(*faaauau itulau II*)

---

# LAUGA I LE FAATALANOAGA O A’OA’O MA FALETUA

O le lauga na saunia i le faatalanoaga o A’oa’o ma Faletua mo le Kolisi Faafaifeau o Malua mo le 2019. Faia aso 14 Ianuari, 2019. Maota o Tupulaga i Mulinuu.

**Tusi Faitau i le Tusi Faitau Aso:  
LUKA 5: 4 – 11**

**MATUA:** Luka 5: 10 – *“Ua faapea foi o Iakopo ma Ioane, o atalii o Sepetaio, o i latou ua faifaiva faatasi ma Simona.”*

**MANATU AUTU:  
“O FAIFAIVA”**

O loo taua e Luka nisi o faifaiva iloga ma le ta’uta’ua, o le tuloto o Kalilaia, faapei o Simona le uso o Aneterea; o Iakopo ma lona uso o Ioane.

A’o tala o latou upega, ae o’o ane loa Iesu, ma a’oa’o atu i le motu o tagata, mai luga o le va’a o Simona Peteru.

Ua uma le lauga a Iesu, ona fetalai atu lea: “Simona, tu’utu’u le vaa i le loloto; ma tuu ifo ai le upega, ina ia maua ni i’a.”

Ae tali Simona: “Le Alii e, ua po atoa, o matou tigaina, e leai se i’a na maua. “Peitai ona o lau fetalaiga, ou te tu’u ifo ai le upega.”

Talofa ia Simona, le faifaiva matapala o le tuloto. Na te le o iloa, soo se faifaiva, e iai le taimi e ‘asa ai lona faiva. E moni lava le upu a le atunuu: “E potole tautai, ae sē lana atu i ama.” E le gata i louā, e iai le isi mea taua e tataua ona maua e so’o se faifaiva, a’o le mea lenā na misi e Simona.

O le ā? O le onosai. Ioe, i so’o se galuega ma so’o se vala’auina, e taua le onosai. Lea ua manino, ua le onosai Simona ma isi. Le ala lea o le faatonu e Iesu – tu’u le va’a i le loloto ma tu’u ifo ai le upega. Silafia lelei e Iesu, e seasea i ai ni ia lapopoa i le aloalo, na o le loloto. Ole loloto e maua ai laua. Na usitai Simona i le faatonuga a Iesu. O le a le iuga o lona usitai? Tele ia, masaesae le upega. Ua taugogoto vaa e lua i le tele naua o ia. Ioe, e taua le usitai ia Iesu le Tautai Sili.

Mulimuli ane ua fetalai Iesu ia Simona Peteru: “Aua e te fefe, e amata i nei ona po, ona e maua tagata.” Na amata mai iina, ona lafoai o latou upega faifaiva o le sami, ae mulimuli atu ia Iesu, IA FAI MA FAIFAIVA MO AGAGA.

Le vasega o le 2019, ole upu moni, e eseese tai sa outou faifaiva ai, peitai, ua outou faataatia ese, e pei o upega o Simona ma isi faifaiva. O le fesili – Aisea? Aisea ua tuu ai lau galuega manaia ma le maualuga, sa tele ai au tupe, sa tausi ai lou aiga, ma faatino ai le tele o ou manaoga? Aisea? O e iloa, o Simona Peteru, tigā le fia malosai fai mai: - “Iesu, ou te mulimuli ia te oe seia oo i le oti.” Peitai, na faafiti lava ina ua vaai atu i puapuaga o le Alii.

Afai la e te fai mai, ua tuu lau galuega, ma au atinae sa fai, ona ua e fia mulimuli ia Iesu, uso, ou te faamanatu atu ia te oe, na fai foi e Peteru le upu lona ae, na faafiti. Ae lei faatasi ona faafiti, leai, faafiti faalua, faatolu. Na oo

a ina maliu Iesu ae fai mai: “Ou te alu ou te faagota.” Ioe, na toe fia foi i lana galuega tuai, o le faifaiva i le tuloto.

E faamaoni lau tala lea o le a fai atu: E iai a’oa’o na muamua atu ia te outou i le Kolisi; na tautino ma folafola faapenei: ou te le toe faia, ou te le toe fia oo i lona ituaiga olaga, le inu ava oona, le tagofia o le mariuana ma fualau faasaina, le gamble ma isi uiga faapena. Peitai, e lei uma le tausaga i Malua, ae tuli. Aisea?

Ua olegia Iesu le Tautai Sili. A’oa’o ma Faletua, aua nei outou olegia Iesu. Ua outou i le amataga o lo outou valaauina e fai ma FAIFAIVA I TAGATA, o le aupega sili mo soo se faifaiva, “o le TATALO,” ae maise lava outou i lenei taimi poo lenei laasaga, le taimi poo le laasaga o le matamata ita o le tiapolo, ona o lea o le a outou o lava, i le ituau a Iesu.

O le upu moni, o le malosai ia o vaega au a le tiapolo o le a outou fetai. Ae, ia outou mataala ma tatalo, nei tei lava, ua e toe pai i le pito ofu o Satani. Ona sili lea o le tinā punatoto, na pa’i i le tu’upaō o le ofu o Iesu, ma alu atu ai ma le mana, na faaolaina ai. Ae, a e pa’i i le pito ofu o Satani, na o le mama e te fano ma oti ai.

O Iesu le tautai sili. O le tautai o tau matagi ma le loulouā, le tau lualuta ma le vasa souā. O le tautai foi mo agaga fia faaolaina. O Ia o le faifaiva mo Agaga – lea na faaatoatoaina, e ala i lona maliu ma lona toe tu manumalo.

Lea ua valaauina ai i tatou, e fai ma faifaiva i tagata, ina ia toatele ni agaga e maua, mo Ia ma Lona Malo, nei, ma aso uma, e oo i le faavavau, faavavau lava Amene.

**Saunia: Iosefa Uilelea (FT)  
Failautusi Au Toeaina  
\*\*\*\*\***

---

# OLE AGAGA O LE ATAMAI GAGANA

lava lea o ona puapuaga. O iina na amata ai ona tuua'ia o ia i se va'alele na pa'u (*Lockbie*) e ui e leai se fa'amaoniga, seia o'o lava ina tuua'ia i lona sauā i ona tagata ma oo ai lava le oti ia te ia. Ese lava mea moni na tutupu, ese le tala'ave na o tatou maua (*Koenig, 2018*). O le tala'ave foi lena e fausia ai lo tatou iloa ma se atamai.

O le uiga foi lea o Saddam Hussein o Iraq. Ina ua faasala e malo afaatasi le malo Iraq i le tulei atu a Amerika (*UN embargo sanctions*) i tuuaiga le moni i meatau mata'utia, na faaalua ai e Saddam, a maē'a loa faasalaga i le tausaga e 2000, o le a le toe faatauina atu lana suau'u i le Talā (*Dollar*), a o le a ia fa'aaogāina le Euro a Peretania, lona uiga o le a se'e ese ai le tamaoiga mai ia Amerika lea e pulea le tele o fefaataua'iga o le suā'u – o le uiga foi o le fausia o se tala'ave e faasesē ai tatou uma, ae faama'ite ai le fasiotia o le tagata ona o le mana'o i lana tovine (*Aapo*).

O tala'ave i mea e tele o tutupu i le manatu o lena pepa, o tala o le taufaasesē. Auā,

· e le o Lee Oswald Harvey na fasiotia JFK (Ventura,

· e le'i tu laueleele lava se isi i le masina e oo mai i le asō (*NASA*)

· e le'i osofa'ia e ni vaalele, e le'i osofa'ia foi e Osama le twin towers (*Griffin, 2005*)

· O fefa'ataua'iga saoloto, e taunu'u lava i le tamāoāiga o atunuu tetele, ae pagatia atunu'u laiti (*Chang, 2014*)

· E le tatau ona so'ona nonō mai ni tupe e pei ona faia nei e le malo Samoa.

## PENETEKOSO MA LAFOGA A FAIFEAU

E ui e tele se galuega e faamanino ai le vaega lea o le pepa, a o le fa'apu'upu'u ona o le taimi.

O le Federal Reserve a le malo Amerika, o se kamupani umia sa'oloto (*a private company*) na amataina i le 1913 i se ala faalilolilo e sui o faletupe tetele ma sui o le malo. O le faletupe lea e nonō mai ai ele malo Amerika tupe na te mana'omia, ona toe totogi lea faatasi ma le tului. E totogi faapefea? E totogi e le au fai lafoga. O le mea matautia, e sa'oloto le Federa Reserve e lolomiina mai tupe (*print free money out of thin air*) mai le computer, ona ave lea i le malo o le faitau tiliona (*trillions*) o ia tupe, ae a toe totogi mai ona maua fua lea o ana tupe. E lasi foi auala a nei faletupe tetele e le gata e faaputu ai pea ia tele a latou tupe, ae faapea foi ona faatumauina ai pea le tagata nonō tupe i le mativa, ma faamalosia ia nonō atili ni isi tupe. O auala palapalā ia a nei faletupe tetele e faoa ai aseta patino (*real assets*) e pei o fale, fanua, o kamupani ma isi. E tele atunuu o le lalolagi ua faoa ana aseta ma pulea e faletupe o le lalolagi, ona o le seetia i nogatupe na faimai e **maulalo le tului**, ae te'i ane ua le mafai ona totogi, e afua ai ona faoa mea totino e pei ona sa tupu i Mexico ma le tele o isi atunuu. O le popolega lea o iai nei Samoa ma le finau mai ole malo sei totogi aitalafu a faifeau. Ole a le faia se tali a le pepa i le fesili pe tatau ona totogi lafoga a le au faigaluega, a o le a faamatogi se tali mo le fesili:

Pe aisea ua moomia ai le totogi e faifeau o ia lafoga?

O le tali, ona ua uma ona tautino e le malo i faletupe na aumaia ai ia aitalafu, aua le popole, faitalia tagata fai lafoga ona toe totogi le aitalafu, e manatua ai le upu i le

ūga ma lona atigi. Ole so'otaga foi lea ole mataupu nei i lafoga, ma le mataupu i fanau lea ua faamalosia lava ona taumafai e aveese le pule mai tagata lautele, ae avane i se tagata se to'atasi (*sa'o*), e faigofie ai ona faamalie tu'utu'uga na ta'utino i faletupe tetele, ina ia faia auala e faigofie ai ona faoa faa-le-tulafono measina tu'ufa'asolo a aiga. Lea foi ua mafua ai ona fausia tala'ave faapumo'o faimai na o le Loia Sili e iloa faauiga le tulafono, o isi loia uma e le malamalama i le tulafono. O le ituaiga gagana lena o taumafai e fafau ai se tala'ave – faimai e tonu ae le amiotonu, e moni ae le faamaoni, faimai e sa'o faa-le-tulafono ae sili ona pi'opi'o i le silasila a le Agaga.

Ua tele foi ina finau mai le malo faapea e “tusa ai ma le tulafono a le Maota fono lena.” peita'i ua taugā lava faalavalava o le tulafono, i ona suiga ogaoga ua faia e le malo ina ia fausia ai lana tala'ave faapumo'o, ua aveese ai le leo o le Itu Agai ma sui o itumalo ma alalafaga - o le aveese lava lea o le gagana, le leo, ma le sa'olotoga faafaipule sa i ai muamua.

Manatua o le tautala i gagana eseese, o le fa'aaogā lea o le gagana a le isi tagata, o le faamautiina foi lea ma le talia o le tagata moni (*identity*) o le isi, faamatu'u atu lea o le pule i le isi tagata, e tapua'i ai ia i le Atua i lana lava gagana, i lana lava aganu'u, i lona lava sa'olotoga, ma lana lava pule o le tagata sa'oloto, e molimau ai foi mo le Tala Lelei. O le Penetekoso, e siitia ai le taua o feso'otaiga, e afio ifo ai le agaga Paia, ma faatumuina ai le tagata molimau. O le tagata molimau, o le isi lea famamafa a Luka mo le Penetekoso, auā lea ua afio mai le Agaga Paia ma le mana, e faamanaina ma faalototeleina ai i tatou ina ia tula'i e pei o Peteru

(*faaauau itulau 12*)

# ITULAU MO TUPULAGA TALAVOU

## LAULAUFAlVA

### Iakopo 3:6-12

E aoga ma taua, o se tasi o vaega o itu tino o le tagata. E itiiti ae tetele ma lapopoa afaina e tutupu ai i le tagata.

O le laulaufaiva o le afi lea. Ua tatou vivii ai i le Atua le Tama, o

lea foi ua tatou fetuu ai i tagata ua faia e foliga i le Atua. E luai mai le gutu e tasi le vivii ma le fetuu. Ia pulea ma faautauta ia te ia.

**Salamo 34:13** “Aua nei tautala lou laulaufaiva i upu leaga, ma ou laugutu nei tautala faaoleole.

**Faataoto 13: 3** “O lē na te leoleo i lona gutu e tausia e ia lona agaga, ao le faamaga ona laugutu, e ia te ia le malaia.

**Faataoto 21: 23** “O le ua leoleo i lona gutu ma lona laulaufaiva, e tausi o ia ia te ia ai puapuaga.

**1 Peteru 3:10** “Aua o le fia manao i le ola, ma ia iloa aso lelei, soia le tautala lona laulaufaiva i upu leaga, ma ona laugutu aua le tautalatala faaoleole.

Ia faautauta ma aua le tautala vave ma tautala soo i mea e lei mautinoa ma le lē aoga.

“Hold your tongue.”

### MO TUPULAGA

Muamua Fanau oe i le Tupu a’e ai ma Fanaufouina i le Agaga Aoaoga e taiala i le toe fanau fouina o oe ma a’u.

**1) Fanaufouina i le Agaga Fou**  
**Esekielu 36: 26** – “Ou te avatu foi ia te outou le loto fou, ma ou tuu i totonu ia te outou le agaga fou, ou te aveese le loto ma’a ai o outou tino, ma ou avatu ia te outou le loto aano.

**2) Amata mai le Atua.**  
**Ioane 1: 13** – “O i latou e le o le toto na fanau ai, e le o le manao foi o le tino, e le ole loto foi o le tagata, ao le Atua lava.”

### 3) Manaomia le loloto o lau vaai faale Agaga

“Ua tali atu Iesu ia te ia, “E moni e moni ou te fai atu ia te oe, a le toe fanau le tagata, e le mafai ona iloa e ia le malo o le Atua.

O lē ua fanau mai i la le tino, o le tino lea, o lē ua fanau mai foi i le Agaga o le Agaga lea.

### 4) Avea ma tagata fou

**2 Korinito 5: 17** – “O lenei, afai o ia Keriso se tasi, o le tagata fou ia, ua mavae le ola tuai faauta, ua oo mai le ola fou.

**5) Ua tatou maua le faaolataga**  
**Tito 3: 5** = Iesu – “Ona faaola mai ai lea ia i tatou, e le ona o galuega o i le amiotonu sa tatou faia, ae tusa ma lona lava alofa i le faataeleina i le toefuataina ma le faafouina e le Agaga Paia.

### 6) Faatonuina mai e le Upu a le Atua (Tusi Paia)

**1 Peteru 1: 23** – “Ua fanaufouina outou e le o le fua e pala, ao le fua e le pala lava, o le Afioga a le Atua lea ua ola ma ua tumau e oo i le faavavau.

**7) O lou toe fanaufouina ma le suia o lou olaga e maua lea i lou “Faatuatua” ia Iesu Keriso ma le loto faamaoni atoatoa.**

**1 Ioane 5: 1** – “O i latou uma o e talitonu, o Iesu Keriso lava lea, ua fanau mai i latou mai le Atua, o i latou uma foi o e alolofa i le ana le fanau e alolofa fo i latou i lana fanau.

E tatau ona suia le olaga ae aua e te fia malosi aua e leai se tasi ua paepae ma le amio i luma o le Atua.

O oe e te lelei ai, o oe foi ete malaia ai.

**Tusia:**

**Solomona Tuatagaloa  
Faifeau Toeaina Penisione  
Malolo**

\*\*\*\*\*

## O LE AGAGA O LE ATAMAI I GAGANA

ma le au so’o ua fa’agaganaina i le mana o le Agaga. Na saunoa le tamā o le Ekalesia ia Teipo Malifa i le sauniga ananafi, o le malo e tu lava mo tagata maumea, tagata malolosi ma maualuluga, ao o le Ekalesia e tatau ona tu mo tagata matitiva.

O se mea le amiotonu le faatonu mai (*dictate*) e atunuu ma fale tupe tetele o le lalolagi le soifuaga o Samoa, tatou te o atu e nonō mai pea ni tupe, lea ua ōgaōga lava le tau o le soifuaga, ona ua soona fai aitalafu ma le lē fuafua lelei, ae faamoemoe e totogi e tatou.

Pe tatau ea ona totogi lafoga a faifeau? Ailoga.

Le ekalesia e, tula’i ia, tula’i mo ou tagata ua mamafatū le avega, tulai leo tele pei o Peteru, tula’i e lauga atu i se tonu e amiotonu, se moni e faamaoni, se tala sa’o e leai se pio. Tula’i ua ia te oe le mana o le Agaga – o le AGAGA O LE ATAMAI I GAGANA.

Manuia le Fono Tele o le 2018  
Soifua.

\*\*\*\*\*

# O E UA FAI'ILAGI LE FOLAUGA

## **SINA GAFO MULIPOLA LIAINA**

(Tamaita'i Tiakono)

Aso Fanau: 29 Setema 1961

Aso na Maliu: 01 Setema 2018

O ia o se tinā nofo to'atasi ina ua maliu lana tane ia Tausaga Iorama i nai tausaga e lei mamao atu tele i tua, a'o le'i faa-tuina lenei lotu i le aso 04 Novema 2012. Ua nao ia lava ma si ana fanau e to'a lima(5) ma si ona tinā matua ia Sarai Mulipola lo latou aiga i lo latou fanua i Vaitele-fou. Ina ua tau faamaopopo nisi latou te amataina le lotu i Nuufou nei, ae o'o mai Sina e ofo mai o ia ma lana fanau faatasi ma si ona tinā matua ina ia avea ma se tasi o matafale faavae o le Aulotu.

O ia o se tinā e faamaopopo i le tele o mea sa tau atiina'e ina ai lenei aulotu; faapei o le mafutaga-a-tinā male aufaipese lea lava sa avea ai ma ta'ita'i-pese mo le tolu tausaga. E maliu nei o ia o loo avea ma ta'ita'i-pese. E fiafia e auai i a matou Lotu Auleoleo i vaveao o aso Toonai taitasi, ui lava i le mamao o lona fale ma le fanua o le lotu. E fiafia e auai i galuega a le mafutaga-a-tinā mo le faamamaina o le fanua ma e muamua mai lava o ia i galuega uma. E toaga e aumai lana fanau iti, o fanau a lana fanau i a'oga a le Faifeau ma le a'oga Aso Sa i taeao o Aso Sa taitasi. O le aso 02 Iulai 2014, sa faaaofia ai lona tofi tiakono i le Potopotoga a le Pulega sa faia i Vaigaga. Sa avea ma usufono tinā o le Matagaluega a Faleata mo le Fono

Tele i Malua i le 2017, 15-26. O se tinā faatuatua, talitonu ma faamoemoe i le Atua mea uma na te faia. O ataata lafoia ia; ma foliga vaaia ia ma molimauina o le olaga kerisiano o lenei tinā i le galuega a le Atua atoa ai ma le atiina ae ina o si ona aiga i le itu faa-le-agaga. O se tinā ua taunuu ai upu a le fai-Salamo; "Le Alii e, ua fai oe ma mea matou nonofo ai i lea tupulaga ma lea tupulaga. Ua e liua tagata ia momomo; ma e fetalai mai, Outou le fanau a tagata ia liu outou; auā e tusa i ou luma le afe o tausaga ma le aso ananafi ina o mavae atu, ma se leoleoga o le po." Salamo 90: f1, f3 & f4. I le manatu o le fai Salamo, e tusa i le Atua le tagata e ola i le umi ma le tele tausaga o lona soifaga ma ana mea e faia mo le Atua; ma le tagata e ola mai ae maliu i se olaga puupuu ma saasaa ae faaaoga ina ma le tataua lona ola e tautua ai ma auauna faamaoni ai i lona Matai.

O se tinā talavou; a ua vave faamanavaina ana galuega ina ua finagalo lona Matai ua lava lea, ae sau ia i luga nei auā o le mea e iai lou Matai, e i ai faatasi ma lana fanau aua ua malie-ō, ua malie mālō, ua faasaō mea ua e faia.

Sa maliu faafuasei o ia i lona aiga i Niu Sila ao asiasi atu i nai fanau; ma o se gasegase faafuasei sa ogatia ai o ia ma faanatinati atu ai loa i le Falemai ma maliu ai lava i le aso 01 Setema 2018. O le Aso Tofi, 06 Setema 2018 sa taunuu ai lona sa i le malae vaalele i Faleolo ma matou malaga sao mai ai i le Falemaliu o Ligaliga i Malifa e faia ai lona uluai sauniga i le itula e 6:00 o le afiafi; ma tofa ai o ia iina. O le itula e

6.00 ile afiafi o le aso Faraile, aso 7 Setema 2018 sa ou ta'ita'iina ai i le tatalo le aveeseina maia o lona tino maliu; ma molimoli atu ai loa i le Malumalu o le EFKS i Nuufou mo ona sauniga faa-le-aiga. O a'u sa ta'ita'iina, tatalo Enoka Aperaamo (FS) ae faia e Tafai Galumalemana (FS) le upu faamafanafana ona o i laua lava o faifeau o le aiga. Sa molimau lana fanau ma le toatele o lona aiga i lea sauniga faapitoa.

O le taeao o le aso Toonai, aso 8 Setema 2018 i le itula e 10:00 o le taeao, sa faia ai lona toe sauniga i le malumalu lava o la matou aulotu; o le Falesa sa ia fita-i-tuga ai ma gapatia ai e fai i ai lona sao taua ina ia tu ma faamamaluina mo tapuaiga i le Atua. O au sa ta'ita'i, o Posala Tiotio (FS) sa aumaia i totonu lona sa ma faitauina le Tusi Paia. O talosaga sa gafa lea ma Taoauvao Teveli Lefulefu (AF). O le lauga sa faia e Iamafana Faauga (FS), ole faifeau nofoaiga o lenei aulotu. O molimau, o le tinā matua ia Sarai lona tinā, o Tulei Tausaga sa fai ma sui o le fanau, o Mulipola Liaina (TKT) mai le Matagaluega a Manukau i Niu Sila sa fai ma sui o le aiga; ia ma Christina Faauga, faletua o le faifeau o Iamafana sa fai ma sui o le mafutaga-a-tinā. O ona toe sauniga sa faia lea i lona fanua i Vaitele-fou ma matou faa-tofa atu ai ia te ia i le pese masani o le au-uso kerisiano o ē ua momoe ma le filemu.

Talofa, uso e, tofaina oe! Ua sau le itupo e malolo; E ala oe pe a mavae le po. Tofa! Tofa! Tofa! – Ia manuia lau malaga Sina.

Saunia:

**Letaulau Poufa Pesaleli (FS)  
EFKS Nuufou**

\*\*\*\*\*

---

# O E UA FAI'ILAGI LE FOLAUGA

## **MANESESA APELU EKEROMA**

*(6 Iuni 1962 - 15 Aperila 2015)*

O le tinā Ekalesia o le EFKS Ierusalem Fou, Tafuna, Amerika Samoa. O ona matua o Leulua'ialii Salima Mataafa Apelu Ekeroma mai Sapapalii, ma Luse Tutonuivainiu Situe Ekeroma mai Taelefaga Fagaloa. O ona matua o nisi ia sa taofimau ma tumau pea i le EFKS ina ua solomuli ese mai Tutuila ma Manua. Ma sa tele lona sao i le faamautuina o le Aulotu ina ia pipii mai pea i le Ekalesia Samoa. Na soifua mai le tinā i le aso 6 Iuni 1962, ae valaauina e lona matai i le aso 15 Aperila 2015. E toalua si ana fanau o Apelu Corderro Ekeroma ma le tama'ita'i o Tutonuivainiu

Juanita Ekeroma. E to'a ono ona tuagane ma ona uso e to'a fa.

Sa iloga le tautua a Manesesa i le Ekalesia. Sa avea ma Faia'oga Aso Sa ma filifilia e fai ma failautusi o le mafutaga a Faia'oga Aso Sa. Sa tautua foi i le aufaipese ma tofia ai e fai ma Failautusi i le Aufaipese. Sa auai ma lagolago i vaega uma o le Aulotu i mea sa mana'omia ai ana meaalofa mai le Atua. O se tinā to'aga e faigaluega a o tautua i le malo o Amerika Samoa i le Matagaluega e Faafaigaluegaina tagata. (Department of Human Resources). Na malaga le tinā i Hawaii e asi si ona tamā ma si ana fanau. Sa maua ai le avanoa e vaai se fomai ma iloa ai ua tuga lona gasegase, ma malii ai lava.

Na taunu'u mai lona sā mai Hawaii i le po o le Aso Faraile 24 Aperila 2015, ona fai lea o lona ulua'i sauniga. Sa ou ta'ita'iina lava le sauniga i lea po. O le Aso Sa 26 Aperila 2015 i le 2:00pm,

na aveese ai lona Sa mai le fanaega i Fagaalu, ma fai lona sauniga i le maota o le latou aiga i Pagopago, ma fai ai faiga leo ma nisi sa'afiafiga mo le tinā. O le taeao o le Aso Gafua 27 Aperila 2015 i le itula e 9am, na faia ona toe sauniga i le malumalu EFKS Ierusalem Fou. Sa molimau si ona tamā o Salima Mataafa Apelu Ekeroma, faapea le susuga i le faifeau o Rev Letaulau Pesaleli, ma si ana fanau pele. O a'u sa saunia foi lona molimau fa'aleagaga, ma le upu faamafanafana. O talosaga ma le faitauina o Afioga Paia a le Atua, sa saunia e A'oa'o Fesoasoani, o Auva'a S Kupa ma Faumuina Lautaimi. Na faaii mea uma ina ua momoli lona sā i lona nofoaga mau i lona aiga i Pagopago. Sa ou ta'ita'iina ai ona toe sauniga ma faatofa atu ai i le pese a le Au Kerisiano, Tofa alu ia oe i le nuu paia.

Saunia: Rev Alapi Tapusoa Eti  
EFKS Ierusalem Fou  
Tafuna Amerika Samoa.

\*\*\*\*\*

---

## **LUSE EKEROMA AFOA**

*11 Tesema 1965 - 1 Aperila 2018*

O le Faletua o le Tiakono EFKS Ierusalem Fou, Tafuna Amerika Samoa. O ona matua, o le tamā ia Leulua'ialii. Mataafa Salima Apelu Ekeroma o Sapapalii ma le tinā o Luse Tutonuivainiu Situe Ekeroma mai Taelefaga i Fagaloa.

Sa faaipoipo atu Luse i lona alii, o Tu'u'u Ula Afoa i le aso 1 Iulai 2004. Na faapaiaina lo la tofi Tiakono i le maota aulotu i le aso 4 Fepuari 2007, ma tautua mai ai ma le faamaoni seia oo ina valaau mai le Atua i le tinā.

O se tinā fai aiga lelei, e osiosi ma faamaopopo aiga. O se tinā sa fiafia e tautua ma sa fai ma ana mea suamalie le ola Faa-auauna. Sa faamanuiaina e le Atua i taleni e tele, e fesoasoani i ona faiva alofilima faa tinā. Sa

faatuatua i ai le loto o lona to'alua aemaise si ona tamā o loo soifua mai pea, atoa ma lona aiga i mea uma.

O Luse o se tinā fai mea lelei e le gata i lona aiga, ae sa faatitino lona fai mea sili i le galuega a le Atua. Sa mataina i lo la tofi tiakono, ae sa matila lo la aiga ina ua filifilia lona alii i le tofi Failautusi o le Aulotu, ae pale mai o ia i le tofi failautusi a le mafutaga a tinā ma galue ai seia oo ina malii. E le iloa mai ona foliga i lumafale

---

# O E UA FAI'ILAGI LE FOLAUGA

## LUSE EKEROMA AFOA

pe a fai ni mea a le aulotu, ae faamatala mai e gasesega manogi ma ni tapenaga matagofie, foliga o Luse ma lana nofo-tuavae

O ana mea e fai, sa atagia ai lona soifua faatuatua i lona Atua. A sauni le Laoai e faaeteete ma ava i le Atua. A teu falesa foi, e naunau le tinā na te aumaia vaaiga mamalu ma matagofie faale-lagi e faagaetia ai le agaga tapua'i o le tagata, e tapua'i i le Paia o le Atua. E fai mea faasili, o le faailoga o lona ola tapenapena ma mataala.

O le Aso Sa 15 Aperila 2018 na faia ai ona Sauniga faale-aiga. O a'u sa Ta'ita'i, o le susuga

ia Letaulau Poufa FS na ia faaulufale lona sa i le malumalu. Sa faitauina e le A'oa'o Fesoasoani o Faumuina Lautaimi le Tusi Paia, ao le A'oa'o Fesoasoani ia Auvaa Samasoni Kupa na sauina Talosaga. O le Susuga i le Toeaina Penisione Malolo ia Pesaleli Poufa na saunia le lauga. Sa molimau ai le Susuga Rev Letaulau Poufa, Rev Afalupetua Utai, Rev Simon Mageo, Rev Patolo Mageo, Ken Tupua (Director of the Dept of Parks & Recreation) o le Matagaluega lea sa faigaluega ai le tinā, o to'atele o aiga, uso ma tuagane uo ma aumea mamae, Mafutaga Tinā aemaise le ekalesia.

O le aso Gafua 16 Aperila 2018, na faia ai ona toe sauniga i lana Ekalesia pele EFKS Ierusalem Fou i Tafuna. O a'u

lava sa ta'ita'i ma faia le Upu Faamafanafana mo Aiga aemaise le molimau i le soifua faale-agaga o le faletua o le tiakono. Sa faitauina e le A'oa'o ia Auvaa S Kupa le Afioga Paia a le Atua a o le A'oa'o ia Faumuina Lautaimi na saunia talosaga. Na molimau le tamā o Luse, o le tiakono matua lea o le matou aulotu, Mataafa Salima Apelu Ekeroma. Na molimau foi le to'alua o Luse, le tiakono ia Tu'u'u U. Afoa e tusa o le la mafutaga. Ua o se nanamu o u'u lelei molimau o le tinā, ia viia ai lona Matai i luga. O a'u na ta'ita'i ina ona toe sauniga i lona nofoaga mau, ma famavae atu ai i le tinā i le pese masani a le Au Kerisiano ma lona tali e faapea. "E! le lagi e lou tamā o i ai.. a valaauina alu loa, e nofo faatasi ai"...Tofa... Tofa... tofa.

Saunia: Rev. Alapi Tapusoa Eti  
EFKS Ierusalem Fou  
Tafuna Amerika Samoa

\*\*\*\*\*

## MUMU TALALAFIFAIGA KERISIMASI MANILA

(25 Tesema 1972 – 31 Tesema 2018)

O le afioga ia Mumu Talalafaifaiga Kerisimasi Manila, o se tamā Ekalesia i le EFKS Ierusalem Fou Tafuna Amerika Samoa. Na soifua mai Mumu Talalafaifaiga Kerisimasi Manila ile aso tonu o le Kerisimasi 25 Tesema 1972, e afua ai lona suafa Kerisimasi. O ona matua o le tamā ia Autagavaia Vaipou Siliiafai

Tanielu Manila o Palauli ma lona Tinā o Tufuloa Mualeoa Epati mai Iva i Savaii. O lona igoa e masani ai le to'atele o ana uo ma aumeamamae o MASI. Okenaisa Fauolo, o le alo tama'ita'i o le Susuga i le Faifeau toeaina o Rev Oka Fauolo ma Sooletaua. E to'atasi si a la tama o le tama o Titimaea.

O Mumu o se tamā na tulaga ese foi lona tulai mai e tautua le Galuega a le Atua. Sa fai ma ana mau tauave i lona soifua galue le a'oa'oga a Iesu..." Ai se fia sili ia fai ma auauna, a fia muamua, ia fai ma tautua." E tausi mamalu, ae le mapo mamalu. Na te iloa

lona va ma isi tagata. O se tagata faaaloalo ma le loto fesoasoani. E fiafia e gasese ma tautua mai i tua faatasi ma tupulaga aemaise uso tiakono. E aga malie ae atamai foi, sa faigofie ai ona pipii i ai loto o ana uo aemaise o tupulaga. O se Auauna sa nofo sauni i taimi uma e mana'omia ai lana fesoasoani, ma e le faapaole foi ona galue ma tali mai. E osi aiga ma ia faamaopopo lona aiga. E toatele ona uso ma ona tuafafine, ae o Masi lana sa faafeso'otaia i latou uma ma feiloai ai.

E tele ni galuega sa faigaluega ai o ia, ae maliu nei Mumu o galue i le Ofisa Faaunega

# O E UA FAI'ILAGI LE FOLAUGA



**SINA GAFO  
MULIPOLA LIAINA**



**LUSE EKEROMA  
AFOA**




**MANESESA  
APELU  
EKEROMA**

Kupa sa fai talosaga, ma Afioga Paia sa faitauina e Faumuina Lautaimi.

Sa ou ta'ita'iina toe sauniga i lona nofoaga mau, ma faamavae atu i le uso i le pese a le au faatuatua.." "Alu ia oe i le maota i le lagi.. O i ai le filemu"..Tofa...Tofa...Tofa Masi.

**Saunia: Rev Alapi Tapusoa Eti  
EFKS Ierusalema Fou  
Tafuna Amerika Samoa**



**MUMU  
TALALAFIFAIGA  
KERISIMASI  
MANILA**

Tupe e taua o le Lima Fesoasoani. Sa faatuatuaina ai foi lana tautua tausa'afia i lea foi galuega.

E fa'ateia tagata uma i le faafuaseia o lona maliu. Aemaise i le aso mulimuli o le Tausaga o

sagisagi ai aiga ma uo aemaise o aulotu e faafeiloai le Tausaga Fou i le po o le vaeluaga. Ae ui i lea, e pule pea le Atua. O le Aso Tofi 10 Ianuari 2019 i le 5 pm, na faia ai lona family Service i le malumalu o le Maota gasegase i Fagaalu. Sa ta'ita'iina e le Susuga ia Rev Periti Fauolo ma le tele o molimau matagofie i lona soifuaga.

O ona toe sauniga sa faia lea i le malumalu o lana Ekalesia, EFKS Ierusalema Fou, Tafuna i le 10am. Sa ou ta'ita'iina lea sauniga ma fai le molimau o lona soifua galue i le Ekalesia ma le upu faamafanafana. Sa molimau le tinā o Mumu, Tufuloa Mualeoa Epati, ma le uso o lona tinā e fai ma sui o aiga. Sa molimau foi lona faletua, o Aiono Keseta Okenaisa Fauolo Manila i le la mafutaga sa fefaasoa'ai ai a la meaalofo o le ola mai le Atua o le ola. O Susuga i A'oa'o Fesoasoani ia Auvaa

## (Fa'asa'oga)

Faa'malulu atu i le mamalu o le au faitau Sulu ona o le miss type i le Sulu Samoa o Ianuari, o le igoa o Ietitia Si'upepa o loo i le ata i le pito i tua fa'asaoga IETITAIA SI'ULEPA.  
Ma le fa'aaloalo lava faafetai.

## John 8: 32

**"Then you will know the truth, and the truth will set you free."**